

L'é tel web l davegnir de l'informazion

Duc i sistemas de difujon penalisea i picoi, ajache en proporzion numer mender vel semper dir cost maor. Internet l'é meso de comunicazion più ledech e l più adatà a la mendranzes



L grop de giornalisç ladins à podù veder la realtà di mass-media de la Catalonia.

La neva tecnologies, desche l passaje da l'analogich al digitèl e la difujon sul web, l'é ocasions n muie prezioses per bater jù la barieres e smaorèr i spazies, ge dajan maor lèrga e degnità ai lengac de mendranza e i fajan cognoscer cossità te dut l mond.

tecnologies l'é stat un di argomenc che à soscedà più enteress anter la delegazion di operadores de mass-media ladins e furlegn te sia vijita a Barcelona.

"De gra a la neva tecnologies podon rejonèr de nos enstes al mond, podon palesèr noscia identità. Esser universèl, fèr pèrt

del mond, vel dir poder esser nos enstes." Con chesta chièra e scempia paroles l'à avert l convegn Aureli Argemí, president del Ciemen, l Zenter internazionèl per la mendranzes etniches nazioneles, che ge à dat alberch a chest 5° seminarie di giornalisç te tera de mendranza de la Catalonia.

Fotografia, radio, televizion, internet, e sia interazion sul web, l'é ocasions da no poder più perder per la soravivenza de n lengaz de mendranza e per sie prestije tel mond. Mesi de comunicazion neves e atuèl, che i operadores di mass-media ladins e furlegn cognosc, chi de più e chi de manco, che à dat l met de meter a confront esperienzes jà proèdes, tanche envièdes via o amò da creèr.

L'ejempie concret de coche n lengaz pel vegnir durà tel web l'é vegnù da Vincent Partal, diretor responsàbol de "Vilaweb", l prum sfoi on line de la Spagna scrit dut per catalan, nasciù del 1995.

"Vincolèr l lengaz a l'inovazion



e creèr struments tecnicos che pel identificà l lengaz a livel global" l'é stat l'idea venjidora de Partal. Se acà pec egn n lengaz vegnia considrà global se l vegnia rejonà da milions de persones aldidanché n lengaz l'é global se l vegn durà te la rei globala.

Jir sorafora l local, investir sui mesi de comunicazion mondèi, lurèr per l recognosciment global del lengaz de mendranza: pontan demez da chisc conzec Partal à fat doventèr l catalan un di lengac più durè tel web, adertura l'é stat l terz lengaz a vegnir durà te Facebook, dò l'ingleis e l giaponeis.

L catalan s'ira asvelto tel web, l vegn durà a la pèr di maores lengac del mond. La conferma de sie aut livel de prejenza te chisc neves mesi de informazion e de la responeta positiva de la jent se l'à tocèda con man en ocasion de la vijita a la redazion de Vilaweb.

Chiò l diretor responsàbol Roger Cassany, te n bel talian, l'à moscià e spieghà coche vegn fat chest sfoi. Na equipe de 10 giornalisç, 8 redatores e 2 caporedatores, che laora da les 6 da doman a la does de not. N sfoi nef, joen, atual e simpatic che dombra 60.000 azesc ogne di. Numeres che fèsc dassen marevea. Su la piata web del sfoi Vilaweb se pel lejer en dut 12 articoi, ogne doi ores vegn mudà fora l o 2 articoi, chest vel dir che la

redazion cogn enjignèr più o manco 25 articoi al di. Chel che fèsc marevea l'é che apede a la informazions scrites se pel troèr ence video. "Ogne giornalista à na sia picola videocamera e n fonin che pel fèr video – à spieghà Cassany – percheche la notizies no vegn demò scrites, ma ence documentèdes con video." Investir su la creatività, conzentrèr i sforz sun argomenc e evenc che ciapa l'atenzion de la jent, mantegnir n bon balanzament anter chel che la jent "cogn" saer e chel che "l'à piajer de saer" (se no l'é notizies, se cogn les inventèr – à dit Cassany) l'é vèlch bona strategia per l'usess di lengac de mendranza ence tel web. Vilaweb sporc ence n muie de link, n forum, e la vilaweb tv, olache vegn moscià i video de cronaca o aprofondiment atuèl. Na parentesa é stata fata da Partal ence sul digitèl. "Nos aon cernù de no investir sul digitèl percheche cherdon che no sie l meso mior per fèr informazion. L davegnir à inom "televizion a la carte" olache l'utent pel cerner enstes che programes veder e da che ora che l vel." Chesta la realtà catalana, ma per chel che vèrda noscia realtà l'é da fèr i conts con dotazion de organich e atrezatures minimales e che domanassa na formazion profesionèla adatèda.

Monica Cigolla

